



Sternschnuppen



Host du scho amoi Stemschnuppn  
gseng? Ned? Ja, des glaab i. Du  
soiadst aa schlaffa, wenn de fliahn.

Stemschnuppn san kloane,  
weiße Liachta, de übern  
Nochthimme rennan. Ois wia  
wenns auf ana steiln Rutschn  
oberutschn.

De Liachta kemman doher, weil do im Himme drobn kloane  
Stoabreckal und Staabkernndl verglian.

Ma braucht scho a Geduid, damit mas ned  
vasammt. Und wenn ma dann endlich oane  
sigt, dann is nach ned amoi oana Sekundn  
scho wieda vorbei. So schnej san de.

De bekannteste Stemschnuppe  
is da Schweifstern übern  
Krippal an Weihnachten  
und grad zu dera Zeit  
san a bsunders vui  
von eana am Himme  
untawegs. De hoaßn Geminiden.



Jetztat im Summa, do konnst aa leicht wejche am Himme seng. Bsunders vui am 12. August. Bis zu 100 Sternschnuppn in da Minuten wischen do übern Nochtimme.

De hoäßn Perseiden oder aa de Laurentiustränen. Da Laurentius war a Heiliger und der hod am 10. August Namensdog. Ziemlich genau dann, wenn de meistn Sternschnuppn übern Himme fetzn.



Und am End no a Geheimnis: Wennst du a Sternschnuppn sigst, dann mach gleich deine Augn zua und wünsch da wos. Ned weida sogn, wost da gwünscht host, dann gäht da Wunsch in Erfüllung.

Host as scho gwusst? A Musikgrupp fia Kinda hoäßt aa „Sternschnuppe“.  
De hobn richtig guade boarische Liada. De findst du do:  
[www.sternschnuppe-kinderlieder.de](http://www.sternschnuppe-kinderlieder.de)

Pip und Posy, des san zwoa Mäus im Fernseh, de hobn aa  
Sternschnuppn beobacht. Wenns Mama und Babba erlauben, konnst ja  
amoi eimeschaung.


[www.zdf.de/play/animation/pip-und-posy-102/die-sternschnuppen-102](http://www.zdf.de/play/animation/pip-und-posy-102/die-sternschnuppen-102)

Und wennst a kloans *Geschichtl von da Elke Bräunling* über Sterndl hearn  
wuißt, des erzählt da de Birgit unter dem QR Code.

Oiso du sigst scho: Sternschnuppn san wos ganz wos bsunders!

Mia wünsch ma dir ganz vui Freid, Geducid und Erfolg beim Sternschnuppn  
beobachtn,

dei Leo Löwe, Schnuffi Mankei und de Imp



Quellen:  
[www.de.wikipedia.org/wiki/meteor](http://www.de.wikipedia.org/wiki/meteor)  
[www.elkeskindergeschichten.de](http://www.elkeskindergeschichten.de)  
[www.zdf.de](http://www.zdf.de)  
[www.kleiner-kalender.de/rubrik/sternschnuppen.html](http://www.kleiner-kalender.de/rubrik/sternschnuppen.html)

**Herausgeber und Verleger:**

Förderverein Bairische Sprache und Dialekte e.V.  
Salzburger Str. 62a, 83435 Bad Reichenhall  
Telefon: 0865 1-7680098  
E-Mail: [info@fbsd.de](mailto:info@fbsd.de)  
Internet: [www.fbsd.de](http://www.fbsd.de)

**Bild, Grafik und Text:**

Birgit Hackl, Baldham  
Claudia Geisweid, Altomünster